

每週經課朗誦經文(巴克禮漢羅/教羅)2014/07/20

共同經課 - 1 創世記二十八章十節~十九 a 節

10 雅各離開別士巴，ng 哈蘭去。11 到一所在，因為日落，就 tī-hia 歇暝；tùi hiah-ê 石頭 ê 中間，thèh 一塊做枕頭，tī-hia 暈。12 夢見有梯 khiā tī 地裡，梯頂抵天；有上帝 ê 使者 tī 梯裡 teh 上落。13 耶和華 khiā tī 梯頂，講，我是耶和華你 ê 祖亞伯拉罕 ê 上帝，亦是以撒 ê 上帝。我 beh 將你現在所暈 ê 地賞賜你，kap 你 ê 後裔。14 你 ê 後裔 beh 親像地上 ê 土沙；你 beh tùi 東西南北來發展；地上萬族 beh 因為你 kap 你 ê 後裔得 tiòh 福氣。15 我亦 kap 你 tī-teh，你無論去 tah-lòh，我 beh 保護你；亦 beh choā 你 tò 來 chit 所在，lóng 無放 sak 你，到我成對你所講 ê。16 雅各睏醒講，耶和華真正 tī-chia，我竟然 m̄知。17 就驚講，Chit 所在到 chiah thang 驚！m̄是別項，這是上帝 ê 厝，這是天 ê 門。18 雅各早早起來，將伊做枕頭 ê 石 khiā 做柱；倒油 tī 頂面。19 就名 hit 所在叫 Pek-ték-lī

共同經課 - 2 詩篇一百三十九篇一節~一十二節，二十三節~二十四節

1 大衛 ê 詩，交 hō 樂官。1) 耶和華 ah，你已經鑑察我，bat 我。2 我坐落去，我 peh 起來，你 lóng 知；你 tùi 遠遠知我 ê 念頭。3 我行路，我倒 tī 眠床，你 lóng 詳細知；我一切所行 ê，你也深知。4 耶和華 ah，我 ê 嘴所講 ê 話，你無一句 m̄知。5 你 tī 我 ê 前後圍我，按手 tī 我 ê 頂面。6 Chit 款 ê 知識奇妙，我 boē 能測度；真高，我 boē 能到。7 我 beh 去 toh 落，閃避你 ê 神？我 beh 走去 toh 落，閃避你 ê 面？8 我若上天，你 tī-hia；我若睏 tī 陰間，你亦 tī-hia。9 我若 thī 開清早 ê 翼，飛到海 ê 極頭來 khiā 起；10 就若 tī-hia，你 ê 手亦 beh 引 choā 我，你 ê chiáⁿ 手亦 beh 牽我。11 我若講，烏暗 beh 遮蓋我，Koh 四圍 ê 光 beh 變做暗暝；12 就烏暗亦 boē 能遮蓋我，hō 你無看見；烏暗暝親像日時發光。烏暗 kap 光明，在你看 lóng 是一樣。23 上帝 ah，求你鑑察我，知我 ê 心思；試驗我，知我 ê 意思。24 看我有甚麼 pháiⁿ 所行無，Choā 我行永活 ê 路。

共同經課 - 3 羅馬書八章十二節~二十五節

12 Án-ni 兄弟 ah，咱 m̄是欠肉體 ê 債，致到照肉體來活。13 因為 lín 若照肉體來活，就會死；若用神 phah 死身軀 ê 所做，就會活。14 凡若 hō 上帝 ê 神所 choā ê，是做上帝 ê kiáⁿ。15 因為 lín m̄是受 tiòh 奴僕 ê 神，致到 koh 驚惶；就是受 tiòh 設立做 kiáⁿ ê 神，tùi án-ni 咱叫講，阿爸，父 ah。16 聖神家已 kap 咱 ê 神 saⁿ-kap 干證咱做上帝 ê kiáⁿ。17 既然做 kiáⁿ 就做後嗣，就是做上帝 ê 後嗣，kap 基督同做後嗣；咱若 kap 伊同受苦，是 beh hō 咱 kap 伊同榮光。18 因為我算現時 ê 艱苦 boē 堪得比並所 beh 顯明到 tī 咱 ê 榮光。19 因為受造 ê 物 kiáh 頭 ng 望，teh thèng 候上帝眾 kiáⁿ ê 顯明。20 因為受造 ê 物降服 tī 空虛，m̄是伊甘願，就是 tùi hit-ê hō 伊降服 ê；21 是 teh ng 望連受造 ê 物也 beh 得 tiòh tháu 放，脫離敗壞 ê 拘束，來入 tī 上帝 ê kiáⁿ 兒榮光 ê 自由。22 因為咱知一切受造 ê 物到 chit 時 iáu teh saⁿ-kap 吐氣苦痛。23 M̄-nā án-ni，就咱本身得 tiòh 聖神頭水 ê 果子 ê，也心內家已吐氣，teh thèng 候設立做 kiáⁿ，就是咱 ê 身軀 ê 贖回。24 因為咱得救是 tùi ng 望；但是已經看見 ê ng 望，m̄是 ng 望；因為所看見 ê，甚麼人 teh ng 望伊？25 獨獨咱若 ng 望 hit-ê 所無看見 ê，咱就吞忍 thèng 候。

共同經課 - 4 馬太福音十三章二十四節~三十節，三十六節~四十三節

24 Koh 設譬喻對 in 講，天國親像人掖好種子 tī 伊 ê 園；25 人睏 ê 時，伊 ê kiû-siû 來，掖稗 tī 麥中，就去。26 到麥發起來，續結穗 ê 時，稗亦出現。27 家主 ê 奴僕來 kā 伊講，頭家 ah，你 kiám m̄是掖好種子 tī 你 ê 園 mah？tùi tá-lòh 有稗？28 伊 kā in 講，這就是 kiû-siû 做 ê。奴僕 kā 伊講，你 ài 阮去 khau 伊 mah？29 伊就講，無，驚了 lín khau 稗，連麥續拔起來。30 容允兩項平平大叢，thèng 候收割；到收割 ê 時，我 beh kā 割 ê 講，事先拾 hiah-ê 稗，hā kui 把 thang 燒伊；獨獨麥 tiòh 收入我 ê 粟倉。36 Hit 時耶穌 hō 眾人四散，chiah 入厝；伊 ê 學生就近伊講，園 ê 稗 á ê 譬喻，kā 阮解明。37 伊應講，掖好種子 ê 是人子；園就是世間；38 好種子 ê 就是天國 ê Kiáⁿ；稗，就是 pháiⁿ-ê ê Kiáⁿ；39 掖稗 ê kiû-siû，就是魔鬼；收割 ê 時，是世界 ê 路尾；割 ê，就是天使。40 所以親像拾稗 á 來用火燒；tī 世界 ê 路尾亦 beh án-ni。41 人子 beh 差伊 ê 天使 tùi 伊 ê 國內收拾見若 hō 人 tiòh-tak ê，kap 做法不法 ê；42 hiat in tī 火爐，tī hia beh 有啼哭咬牙切齒。43 Hit 時義人 beh 發出光親像日，tī in ê 父 ê 國。有耳孔 ê tiòh 聽。